

508  
91.  
DEO OPTIMO MAXIMO,

UNI ET TRINO,

VIRGINI DEI-PARÆ ET SANCTO LUCÆ  
Orthodoxorum Medicorum Patrono.

## QUÆSTIO MEDICA.

### QUOD LIBETARIIS DISPUTATIONIBUS

*manè discutienda, in Scholis Medicorum, die Jovis decimâ nonâ*

*Mensis Decembris, anno Domini M. DCC. LXV.*

M. ANTONIO CASAMAJOR, CENSORE REGIO,  
DOCTORE MEDICO PRÆSIDE.

*An lui Venereæ sublimatum corrosivum?*

#### I.



RBEM ferè univèrsùm devastabat venerea lues, & novis quotidie famosa funeribus, quæstas irridebat artes, cum felicissimus Carpi hujus pestis antidotum in Mercurio detexit. Jam evanescere incipiebat opinio, quæ mineralè illam substantiam inter venena recensèbat, & in cutis desolationibus, quantâ cum utilitate adhiberetur, Arabum schola docuerat.

Abscissum itaque, quodammodo apparuit humanitatis illud flagellum, & mercurialis unguenti applicatio, ad fugandos tristes errabundæ veneris effectus, diu, solaque invokuit. Sed ab interno mercurii usu, majora adhuc commoda sperantes Medici, ipsum etiam in substantiâ farinâ, saccharo, aut therebentinâ extinctum suaserunt, donec, prælucente Chemiæ face, audaciores facti, mercurialium productorum vires etiam experiri susceperint. Tantâ vi pollebant omnes illæ præparationes, & præcipue quæ ex unione mercurii cum variis acidis mineralibus emergebant, ut quibus mediis edulcorarentur, sollicitè investigaverint. Dùm verò drasticam ipsarum qualitatem infringere, multo labore conabantur, omnis earum virtus evanescèbat, aut illa tantum, quæ minerali propria erat substantiâ, reviviscebatur; sed cum parva in ipsis mercurii quantitas ingrederetur, ut inefficaces in luis venereæ curâ, ablegatæ fuerunt. Inter eas causticâ vi horrendum distinguebatur sublimatum corrosivum. Scelestis tantum manibus destinatum, ab omnibus ferè habebatur, cum hærentibus præ stupore animis in immortalis Boerhavi Chemiâ legeretur, metallicum illud sal, in morbis insanabilibus plurimis, mira esse patrarium. Eruditissimi illius Medici prudentia, cognita in omnibus artis suæ doctrina, ipsum temeritate, aut ignorantia incusare non sinebant. Sublimati igitur vires experimentis confirmare allaboraverunt celebres in arte Viri, & in siphylidis curatione victicia præcipue suppeditavit auxilia. Et revera specificâ virtute, tetram illam luem eradicare debet, si ita edulcorari possit illa præparatio, ut ingesta, deleterii ex ipsâ nulli sobolefcent effectus.

#### II.

QUI potentioribus remediis morbos depellere satagit, eorum naturam calleat, necesse est. Perpendamus igitur quid sit sublimatum corrosivum, & unde sua procedat caustica qualitas.

Sublimatum corrosivum est sal cum excessu acidi exurgens ex connubio acidi marini cum mercurio. Acida autem omnia, sicut ipsa nobis suppeditat distillatio, adeo caustica sunt, ut partes corporis quibus applicantur, corrodere valeant, & eo major est eorum deleteria virtus, quò magis suo phlegmate spoliantur. Metallis injecta ipsa dissolvunt, &, ulteriori elaboratione, cum ipsis varia salia constituunt, magis aut minus caustica, solubilia.

Cum autem ratione dephlegmationis, crescant liquoris acidi causticæ vires, quod major humidi quantitas ipsi restituetur, eò magis etiam decrescere debent, & si non absolutè evanescant, insensiles aded fieri possunt, ut tunc corpora quæ tangunt, non amplius destruere, vix quidem gustus organum ferire queant.

Tali sub formâ considerati isti liquores, jucunda quam linguæ imprimunt sensatio, & ipsius similitudo cum acido sapore fructuum quos, æstuante Sirio, tam liberali manu profudit natura, Medicos impulere, ut ipsorum internè sumptorum virtutes experirentur. In ipsis brevi detecta fuit eadem quæ fructibus horæis propria est antiseptica, temperans, refrigeransque virtus ægris optatam opem præcipuè ferens, in ardoribus quorum fomes erat putrida colluvies. Hinc acida mineralia nullo modo essentialiter esse venenosa innouit, quamvis periculosa ex ipsis erui possint deleteria. Dum enim in maximâ eorum concentratione, mineralibus sociantur particulis, graviora adhuc evadunt, & eorum tunc corrosiva vis eminet. Mercurio nupta, variis, ut jam retulimus, originem præbent mixtis, quæ ab acidis tantum suam mutantur causticam facultatem. In mercurio namque nullo imprimis adulteratum connubio, corrosivam vim exilire, numquam experientia docuit. Strages ergo quas aded funestas edere valet sublimatum, ab acido marino pendent, & imprudenter utenti necem eo certiores inferet, quo liquor acidus sub formâ vaporis, ignis vi, cum mercurialibus globulis sic etiam elevatis, arctiori vinculo connectitur; sed ex eo processu sal metallicum quod emergit, in aquosis liquoribus perfectè dissolvi potest, sicque prudenter administratum, medicamentosis insignietur dotibus toxicum, quod nunc vitæ infestissimum habebatur.

### III.

**S**IMILI enim artificio frænabitur deleteria sublimati vis, ac acidorum caustica qualitas, cum ab ipsis tantum illam mutuetur. Acida verò, ut experientia constat, in aquosis soluta liquoribus, mitescunt. Medium itaque quo sublimati vires, ut & acidorum, ad gradus componamus infinitos, ipsa nobis suppeditabit dissolutio. Tunc enim quodcumque sit liquoris solventis volumen, ipsius quavis portio, soluti salis proportionatam quantitatem continet, & cum illimitata sit illa divisio, minimæ tantum partes dosis minime corporis soluti, viscera nostra subibunt, & sese cum lymphâ, sanguine, & humorum alveo semper immisceando, majorem adhuc subdivisionem experientur. Sed magis causticum semper erit sublimatum, quam acidum marinum. Illius namque guttula in aquæ uncia extensa insensibilis fere est, sublimati verò gratum, in æquali aquæ quantitate, solum, adhuc horrenda patrabat infortunia; sed solutionis ope, quantum volueris, ipsum dividere potes, & sic centesimam, ducentissimam, & millesimam quidem grani partem administrabis. Luce nonne clariùs patet, sublimatum tunc nullo modo periculosum esse, & ad inertiam quidem reduci posse; ast gradatim iterum ascendendo, dosim obtinebis quæ tutè & efficaciter usurpari poterit.

Quot & quanta commoda præstet in praxi medicamentorum solubilitas, ex his etiam innotescit, pulveres eorumque dilutio numquam tanta tamque pretiosa curabunt. Metallica namque partes, in pulverem tenuissimum quidem reductæ, si dissolvi nequeant, nullam alterationem patientur, & ubique semper eandem erunt. Sed cum solutio, potius quantitate, & cum liquoribus nostris miscelâ, majoris adhuc capax sit extensionis, tunc acerrimi quidem mixti particulæ, debiles tantum, sed salutare semper exerent effectus, si præcipuè natales ducant è substantiis, quæ specificis instructæ virtutibus, potentiora quotidie suppeditant remedia, quorum ope deteriores morbos Medicina debellat.

### IV.

**U**T autem dignoscamus, an sublimatum sic dissolutum, virtutibus suis non defraudetur, & dosis existat, quæ cum efficaciâ administrari possit, hic sola concludenda venit experientia, sicut, & ipsâ ducente, medicamentorum vires inquirendæ sunt. Hic ratiocinia deficiunt, & nemo unquam, solâ ingenii acie cujuslibet substantiæ proprietates detexit, quin prius ipsas experimenta prodiderint.

Externæ applicati cū palam innotescat sublimati caustica vis, latere dū non possunt. Sed suā in aquis solubilitate, & solutionis extensione, cum imminui annihilari quidem possit, internum ejus usum, & dosim quæ efficaciter ageret, experiri medicos nihil vetabat. Observationibus nostris paginam adimplere possemus, sed cū celebriores Europæ Medici, hujusce remedii patronos jam sese declaraverint, quid valeret nostra autoritas?

Ne tamen in re tam seriā, aliquid neglexisse videamur rationes etiam, quæ felicem succulcunt experientiam, hic subnectere liceat.

Quodcumque corpus, aliquā virtute potens, majori, aut minori activitate pollet. In excessu semper necet, debilitatum, inefficax est, solum præstat, inter extrema, medium. Ignis ipse rapido si volvatur turbine, vorat omnia, omnia sine igne marcescunt, moriuntur, moderatus omnia vivificat entia. Medicamenta similiter, excessivā si adhibeantur dosi, venena sunt; si debiliori, inefficacia; sola debita quantitas cū utilitate operatur. Nemo namque sennæ libræ decoctum impunè hauriret, gutturæ quædam inutiles deprehenderentur, tres aut quatuor drachmæ commodè alvum ducunt.

Cur igitur ex tam generali regulā sublimatum exciperetur. Quoties etiam non sine voluptatis sensu observavimus ægrotantes nostros, tertio jam die quo sublimato utebantur, ipsius grana duo cū vix assumpserant, notabilem in omnibus mali symptomatis experiri mutationem. Quoties ulcera generationis partes depascentia, veluti incantamento, curata mirati sumus. Adeo enim est intima, & illimitata sublimati cum liquidis nostris miscela, ut statim atque fluidorum oceanum ingreditur, omnes lymphaticæ partes cum ipsius moleculis confundentur, magis ac magis immisceantur, & partium metallicarum contactu atterantur, & dividantur. Quod ut magis adhuc inconcussum maneat, ulceris veneri naturam, & quid ad ejus curationem necessarium sit, expandere fert animus.

Dū æstro titillata venero genitalia turgent, & coitu impuro polluantur, ipsorum aperta subit absorbentia vasa siphylitica lues, & lympham quibus irrorantur, inficit. Viru contaminatus ille liquor, in canalibus suis hæret, ipsa distendit, & pustulam efformat, quæ debilibus vasis, & levissimā pelle cooperta, facile disrumpitur. En, ulcus adest, ex cuius superficie, vasa aperta osculis, acris exsudat, & semper virulenus ichor, qui ipsorum rodens extrema, in largum & profundum continuè serpit. Hocce mali genus nullā aliā arte certè curabitur, nisi illius lymphaticæ gutturæ, quam eructant vasorum oscula, virulentia corrigatur. Tunc enim ad cicatricem omnia natura suppeditabit. Quoties itaque in remedio internè sumpto, talis erit proprietas, ut hunc effectum, alio absque auxilio, patrare possit, asserendum erit eum ad ipsam, quam minoravimus virtutem, tantum referendum esse. Sic autem se habent sublimati virtutes, ut primis ab ipsius usu diebus sese exerant, à capite ad calcem, veneræ aggrediantur symptomata, & ipsa deleant. Quomodo autem concipiatur actio quā virus venereum destruere valeat sublimatum, certum est quod solus contactus inter lymphaticas partes quibus siphylitica lues inhæret, & mercuriales globulos, mali curam absolvere possit. Nec magna mercurii quantitas, ad hunc contactum perficiendum necessaria est, si quædam grana, sed ad infinitum divisa, eum producere queant. Mercurii namque dosi, quæ huc usque ad siphylidis curationem adhibita fuit, inefficaciam illius, quæ cum sublimato introducitur non probat, sed è contrā quam inutilis sit quantitas, quæ in aliis mercurium administrandi methodis fuit usitata, omnibus apertè demonstrat. Vires enim vitæ non sufficiunt, ut mercurius adeo dividatur, ac in sublimati dissolutione, scæque non sine magnā ipsius quantitate, contactus ille generalis partes minerales inter & lymphaticas, in quo cura consistit, obtinetur.

**H**IS innixi principiis, variā quæ nobis proponi possunt facile diluimus objecta. Obgannunt enim aliqui, & clamitant, sublimatum in quibusdam corporis partibus nidulari posse, ibique deleteriam suam vim exercere. Sed quænam est illa

quantitas quàm sic se colligere posse, pertimescunt. Jam una, distributione generali; totam corporis habitudinem irroravit, altera verò per omnes sensibiles, aut insensiles effugere debuit excretiones. Fieri aliundè non potest illa collectio, quin resolvarur mercurii cum acido consortium, & illa decompositio, nullo modo nocere valet. Est enim parva mercurii, & acidi marini quantitas, nullius actionis manifestæ capax. Omnibus aliundè notum est, nullâ certiori viâ periculosos hujusce salis effectus enervari, quam si occurrat ipsi mixtum, quo mediante, sua operetur decompositio. Non ita verò res se haberet, & multò periculosior revera deprehenderetur, si, ut instant alii, divortium cum liquore solvente faceret sublimatum. Sed contra hocce periculum sese obfirmare difficilis non est negotii. Satis enim est pendere, hocce divortium nullâ stabilitum esse ratione, omnibusque dissolutionis notionibus obversari. A solvente liquido salia non sic discedunt, præcipuè si satis extensa sit eorum dissolutio, multò minùs adhuc, si solvens fluidum, sicut corporis humani liquores, perpetuò caleat, & moveatur. Sal marinus ipse, quo omnes quotidie utimur, hujusce divortii particeps non est. In urinâ reperitur, & nemo unquam hocce sal in aliquâ corporis parte collectum observavit, quamvis tunc strages æquè funestas, ac sublimatum, ederet.

Quod verò spectat ad varias ventriculi, & intestinorum erosiones, quæ sublimati usus interni comites individua ab aliis dicuntur, ipsis sanctè asserimus, nos eas numquàm observavisse. Sed caveat ab errore Medicus. Prudenter à prudente Medico tantum administretur illud remedium; abstineat si methodum nescit. Nonne per hæc clarissimi Boerhavi verba, promulgata quasi sublimati proscriptio! Ità sanè abstineant indocti. Sed non desunt sapientes & eruditi in arte Viri qui potentiora remedia tractare possunt, ipsorum natura, præparationes, & proprietates ab ipsis non ignorantur.

Obscurius ne hæc ætate, lateat viscerum structura, quid possint in ingesta ipsorum motus, & actio? Nonne possumus adhuc virium vitæ & medicamentorum effectus ponderare, judicare: quare igitur salutaribus auxiliis quibus abuti poterunt imprudentes, cauti non uterentur. Aliter coerceretur ars quæ nullos limites habere debet, & ipsorum industria, quæ novis opibus illam ditare satagunt, enervaretur. His itaque rationibus, & cum omnes Europæ Academiæ sublimati successus concelebrent, experientia aliundè freti fidenter concludimus.

*Ergo lui venerea sublimatum corrosivum.*

## DOMINI DOCTORES DISPUTATURI.

M. Guido Danié Despatureauux.

M. Cleridus Vachier.

M. Petrus-Josephus Morisot Deslandes, Chirurgia, Gallico Idiomatico Professor.

M. Joannes - Ludovicus - Maria Solier.

M. Henricus-Michael Miffa, Militarium Nosocomiorum ad Regis Exercitum Medicus.

M. Joannes-Nicolaus Millin de la Courvaux, Scholarum Professor.

M. Nicolaus Leroy de S. Agnan Eques.

M. David Vissé, Bibliotheca Facultatis Professor.

M. Ludovicus Claudius Bourdelin, antiquus Facultatis Decanus, Regia Scientiarum Academia, Regia Scientiarum Berolinensis Socius, in Horto Regio Chimia Professor, & Galliarum Principum Medicus Primarius.

Proponebat Parisiis LUDOVICUS-CLAUDIUS GUILBERT Parisiensis, Doctor Monspelienfis, Regis Exercituum Medicus ordinarius, & saluberrimæ Facultatis Medicinæ Parisiensis Baccalaureus. A. R. S. H. 1765. à sextâ ad meridiem.